

業每一學期後由督撫率同教習面試一次畢業後由督撫將學員職名考試分數造冊咨送京師政務處學務處吏部刑部以備察核各等語查各省課吏館業經備設尙無專習法律一門近日直隸議設政法學堂所列科目頗爲詳備與該大臣等所擬辦法相合於造就已任人才佐理地方政治深有裨益擬請 飭下政務處通行各省並查取直隸政法學堂章程參酌地方情形認真辦理隨時咨報政務處學務大臣吏部刑部存案備核謹 奏奉旨依議欽此

### 翰林院奏請酌籌經費與辦實學摺

竊維爲政之要首在得人 國家培養人才莫盛於翰林院論設官本意不責以職專令講求學問研究古今以爲行政之本及其流弊乃至專習詞章精求小楷以爲考試之用雖曰風氣所趨亦緣拔擢人才憑此棄取遂至拋荒實學馴至空疏然考嘉慶以來至於近日翰林如林則徐胡林翼曾國藩沈葆楨李鴻章等或卓著經猷或削平大亂 國家尊賢養士功效昭然則翰林院養育人才亦未可厚非也近者時局艱難動以乏才爲患於是興大學堂講求實學兼及西政三年蓄艾計至深也然由大學通計非旦夕所能收效其中學無本專事西學者又往往蕩軼而越乎規矩惟翰林官中學素所講求若再加以陶鎔於治民行

政之方必能事半功倍臣等每於署中接見必以講求實學宣力 國家相勸勉該員亦多鼓舞奮興力求振作之意臣署中通英文者如龔心釗通化學者如陳驥通算學者如華學瀾李傳元徐謙皆留心時事之才其餘有志向學才堪造就者尚不乏人惟苦於衙署清寒不能聚同官常時講習寂處一室莫遂觀摩又兼欲講西學不能購製儀器物料見功尤難查各衙門多有飯食銀兩以爲辦公經費翰林院因公事清簡遂無此項飯銀今若較六部飯銀減之又減定爲成數大省每年酌籌一千兩其次或五六百兩或三四百兩在各省所出不過如杯水之微臣等將來考察翰林即以所學之深淺定等第之高下四五年後必能培出有用之才以供內治外交之用所費甚微收效甚大可否請 旨飭下各省按年籌解以供講學延師製器之費謹 奏奉 旨翰林院奏酌籌經費興辦實學一摺翰林院爲儲才之地研求實學培植成材實爲當今要務所需購置儀器等費著各省督撫按照所請酌定數目逐年籌解以資興辦原摺著抄給閱看將此各諭令知之欽此

商部奏遵 旨籌議添設藝徒及中等工業學堂並酌擬辦法摺

光緒三十一年七月十七日學務處會同臣部戶部具奏議覆御史王金鏞奏請添設藝徒及初等中等各學堂一摺本日奉 旨著由崇文門溢徵稅項撥給三成欽此仰見 朝廷